

Hibru

Negur Naal Engel Wal Fedif

1 ¹Kulu Negur, profet bunem, sain musei ado naab fire fire bun, tubuda tar wogō fiyēdin, ²anī ere, gama idikeleya naa enidi bun, ī Naal bunem wogō fadan, Naal ī ereb ereb ganan akorouf nigin Negurem igirnen, ī bunem saa teneub ado inon. ³Naal ī Negur nē fula fiya medēiya nē so fiya, ī Negur yogo gen bagai, in od total ado bunem ereb ereb ganan megeir irou ifaref. Ī mosor lilik fiya anī age fel fen, saa ilun Negur Megeir Bagai ima biyalē ibodon. ⁴Negur, Naal yana ifenen are engel yeneid wal fiya, age fiya bagai, Naal ī engel wal fediya.

⁵Ere nigin, Negur ī yogon engel taka to eig ye irokenen,

“Ō neu Kesu,
gama aya ō Tamā wō aul.”^a

Takag, Negur ī engel taka nigin to eig ye iron,

“Aya yogon Tama abodōf,
ī neu Kesu ibodōf.”^b

⁶Takag, Negur ī yogon kesu matu tenebur ein irou isif sain bun, ī baban irok,

“Negur nē engel ganan ī seli dalouf.”^c

⁷Negur ī engel nigin irok,

“Ī yogon engel yau gen wowā douf nigin inodif,
ī yogon kabī tamo yā bale gen wowā douf nigin inodif.”^d

⁸Anī ere, Negur ī Naal nigin irok,

“O Negur, ogon tano gai gai ibodkalauf,
ō ogon tano tobonunā madur bagai bun lo wouf.

⁹Ō tobonunā madur bagai nigin waū laaf fen, tobonunā sane anī sese wedig,
anī nigin, Negur, ogon Negur kulīya nē moul ō bun fi felen,
anī bunem, nē tā tar wal feid fen, ilun inenon.”^e

^a 1:5a Sam 2:7 ^b 1:5b 2 Samuel 7:14, 1 Stori 17:13 ^c 1:6 Diuteronomi 32:43 ^d 1:7 Sam 104:4 ^e 1:9 Sam 45:6, 7

10 Takag, ĩ irok,

“O Odug, gariya bun ō teneub nē gariya kare won,
ō imam saa unon.

11 Idi fau inanakalauf, anī ere, ō fau ubodōf,
idi ganan kolos gen sanef ilauf.

12 Ō idi saket gen kori wediyouf,
idi kolos gen falei wediyouf.

Anī ere, ō ubodok gen ago ubodōf,
ogon sain to idikalauf.”^f

13 Negur ĩ yogon engel taka to eig ye irokenen,
“Imau biyalē ubod mog,

ogon kiwai tar

ō yē inoya nē sawa anouf.”^g

14 Age fiyauaf are, engel idi ere? Idi uur Negur nē kabī daledig, tamo kayau isennēya dalouf anidi disennēdiyof nigin Negurem idi sur fedidig.

Karī Yeleya Nigin Weder Irouya

2 ¹Anī nigin, ada karī taun anī fatuk bagai lo tafalauf, anī bunem, ada to kū tafenēf. ²Negur nē od tubuda tar bun engel bunem wogō difiyēdin are totol ado ibodon, anī nigin, idi od anī didod ken, to dō difen anidi are, anī kilei mala solo darau dalen. ³Anī nigin, ada isennēya odug anī to karī tafiyēf are, naig ta tayalalauf? Uruwa bun Odug ĩ isennēya enei nigin wogō yen, age fe di, idi ĩ karī difiyen anidim, isennēya are momoi anī, ada bun yaor difen. ⁴Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur ĩg isennēya od anī megeir fen.

Jesus ĩ Kel Yaledaya Nē Uyu Irouya

⁵Negur ĩ, engel, teneub mata isiyouf tau fen, wogō taudig anī nē lo fiya tamo, to inenēdin. ⁶Anī ere, Negur nē Itotoya bun taka nem mogo eig ye iron:

“Tamo ĩ ere anī, ō ĩ nigin kisi wof?

Tamo naal ĩ ere anī, ō ĩ nigin karī weledig?

7 Ō ĩ sain naal engel farumedin unenen,

ō ĩ fula fiya medeīya yana ado anī nē teter kurū wiye ken,

⁸ ye farumen ereb ereb ganan gō welen.”^h

Negur ĩ farumen ereb ereb ganan gō felen, are ereb taka ĩ farumen sā anī taka to ibodok. Anī ere, gama ada ereb ereb ganan ĩ farumen ifaref anī to tailef. ⁹Anī ere, Jesus Negurem ĩ sain naal engel farumedin inene ken, ĩ darau yale laa fen nigin, gama ĩ fula fiya medeīya yana ado anī nē teter

^f 1:12 Sam 102:25-27 ^g 1:13 Sam 110:1 ^h 2:8 Sam 8:4-6

kurū fiyen anī ada tailef, are Negur nē wau ifenēya bunem, ī tamo kayau ganan nigin laa ilen.

¹⁰Negur erēb erēb ganan, yogo nigin ado yogo bunem inon, ī kesu tar musei fula fiya medeīya bun irou isiyouf nigin, tamo kel gei fiya nē marau Jesus, darau bunem kisi feleya bagai wō youf nigin agef inenen, are tutuk. ¹¹Yogo tamo kayau fateul ifenēdif ado, fateuledif anidi geid, ibor tekeleif. Anī nigin, Jesus idi turau tar fiyēdiya nigin to mama fef. ¹²Ī irok,

“Aya ō yanā neu turau tar bun kurō afalaisiyouf,
tamo kayau guru difef meleid bun, aya ō selī abiyouf nigin seg
alouf.”ⁱ

¹³Ī baban irok,

“Aya ī bun neu momoiya anouf.”^j

Takag, ī baban irok,

“Aya yeir, Negur ī gere tar ifanan geid.”^k

¹⁴Gere tar idi bouweid ado naudeid ado nigin, īg bouwa ado naud ado idi gen wō yen, are ī yogon laa bunem, Satan ī laa nē megeir irouf anī daū falauf nigin ado, ¹⁵idi laa nigin kumī de fen, sain ganan anī nē ferfer dibodok disin anidi kafī fiya bun tamal yalelnēdiyof nigin age fen.

¹⁶Are momoi bagai, Jesus ī engel to isennēdif, anī ere, ī Abraham nē ibor nē tubu tar isennēdif. ¹⁷Anī nigin, Negur ī, Jesus naab ganan bun yogon tura tar gen inenen, are Jesus ī pris mudur wau yūya, dō fiya biya ado wō ye fen, Negur aruna yalouf nigin ado, ī Negur nē didi yof fen, tamo kayau neid mosor yalelkenēdiya kabī yalouf nigin age fen. ¹⁸Jesus yogo bun kisi fiya wō yen sain bun, ī morō yalen, anī nigin, ī idi kisi fiya bun difaref anidi isennēdiya kisi feleya.

Jesus Ī Moses Wal Fiya

3 ¹Anī nigin, fateul turau tar, āg Negurem iweignein, Jesus ī yogo aposel ado pris mudur, are ada ī nigin momoi tauf taudig, ī bun kisi fatuk tanouf. ²Moses ī Negur nē fō ganan bun, Negur nē od el fe dō fedig, age fiya bagai, Jesus ī, Negur ī igirnen anī ait el fe dō fedig. ³Fō inoya tamo yogo yana odug yaledig, fō anī wal fiya. Age fiya bagai, Jesus ī yana odug bagai, Moses wal fiya. ⁴Fō ganan fō inoya tamo ado, anī ere, Negur ī yogo erēb erēb ganan inoya marau. ⁵Moses ī, Negur nē fō ganan bun kabī tamo ibod ken, Negur nē od el fe dō fedig, agef fen, ī Negur dumen bun erēb wogō youf anī kurō fesin. ⁶Anī ere, Kristus ī Negur Naal, ī Negur ait el fe dōf fen, Negur nē fō lo fedig. Anī nigin, ada toku total tano fen, wauda isef anī nigin yanada talesef anī tarou tokō tafalauf are, ada yogan fō.

ⁱ 2:12 Sam 22:22 ^j 2:13a Asaia 8:17 ^k 2:13b Asaia 8:18

Momoiya Sā Nigin Weder Irouya

⁷Anī nigin, Awa Uur Fateul eig ye irok kilei ago gouf:

“Gama ā, Negur nē ait karī gouf are,

⁸ ā oun gerere tuan Negur kisi wiyēg fen,

kiwai wenēgen age fiya gen,

ā wauī to agef totolouf.

⁹An temeī tar aya kisi difiya fen, kiwai difanan,

are idi yar foti bun ereb age afen are dilen.

¹⁰Anī nigin, aya ibor anidi nigin seye ise fen,

oron, ‘Idi neid waud faimud itorna fen, fire iledig,

age de fen, idi neu naab to keleīdig.’

¹¹Anī nigin, aya seye ise fen, wau kuturol fen, oron,

‘Idi neu si inoya bun to bagai dilauf.’^l

¹²Turau tar, ā takam, wau sane ado momoiya sā anim, mata ibodōya Negur dudum fiyēf anī to ago gouf nigin lo welegei. ¹³Anī ere, od ‘Gama’ yeya Negur nē Itotoya bun yenek anī, ada bun fau agef yenēf are, naa ganan bun abob wau talesagauf, anī bunem, ā taka mosorem idegnē di, wau to totolouf. ¹⁴Uruwa bun ada kisi totol adon anī, kafī tafel tarou, idikeleya bun talauf are, ada Kristus nē ereb ereb ganan weim talef.

¹⁵Negur nē Itotoya eig ye irok kilei,

“Gama ā Negur nē ait karī gouf are,

āgenei tubuī tar Negur kiwai difenen age fiya gen,

ā wauī to agef totolouf.”^m

¹⁶Are aiyaim karī de fen, kiwai dinon? Idi ganan Mosesem Isip tamal guri feid dilen anidim sā de? ¹⁷Negur aiyai nigin yar foti wau sanen? Idi mosor dino fen, gerere tuan gare den anidi nigin sā de? ¹⁸Negur aiyai nigin wau kuturol fen, idi yogon si inoya bun to bagai dilauf yen? Idi yogon od to dō difen anidi nigin sā de? ¹⁹Anī nigin, ada tailef, are idi to momoi den nigin, namen ileyā kisi feleya san.

Negur Nē Tamo Kayau Neid Sabat Si Inoya

4 ¹Anī nigin, Negur nē si inoya bun ileyā nigin, Negur nē promis od anī fau yenek nigin, ā takam si inoya bun ileyā nigin ā to biya ya anī, Negurem to ilouf nigin lo tafalauf. ²Ere nigin, idi karī den gen, adag biya od karī taun. Idi od karī den, anī ere, idi bun faat yūya sā, ere nigin, idi od karī den sain, idi momoiya ado od anī to dalen. ³Gama ada mogo momoi taun, are si inoya anī bun telef. Are idi to momoi den nigin Negur eig ye iron kilei,

“Aya seye ise fen, wau kuturol fen, oron,

^l 3:11 Sam 95:7-11 ^m 3:15 Sam 95:7, 8

‘Idi neu si inoya bun to bagai dilauf.’”ⁿ

Negur nē kabī teneub kare fiya sain bun mogo bure felen, anī ere, ī od agef iron. ⁴Negur nē Itotoya bun, Negur naa sewen nigin eig ye wogō yen, “Naa sewen bun, Negur ī yogon kabī ganān bun si inon.”^o ⁵Baban Negur nē Itotoya enei bun, ī eig ye irok, “Idi neu si inoya bun to bagai dilauf.”

⁶Anī nigin, tunī si inoya anī bun sā dilauf nigin fau ibodok, anī ere, idi uyulil biya od karī den anidi, si inoya anī bun to dilen, ere nigin, idi od anī to dō difen. ⁷Anī nigin, sain meluk ilele di, Negur baban naa taka igir ken, are “Gama” yen anī, Negur ī Dawid sigor bunem wogō yen, are mogo iron gen:

“Gama ā, Negur nē ait karī gouf are,
ā wauī to totolouf.”^p

⁸Josua ī si inoya anī to ifenēdin, ī si inoya anī ifenēdim are, Negur anī dumen naa taka nigin to wogō yem. ⁹Anī nigin, Negur nē tamo kayau neid Sabat^q si inoya fau ibodok. ¹⁰Ere nigin, Negur ī yogon kabī bun si inon kilei, taka ī Negur nē si inoya bun ilef, īg yogon kabī bun si inof. ¹¹Are, taka nem, od to dō difen anidi to dō feid fen, kubū youf nigin, si inoya anī bun ileya nigin kabī totol bagai talouf.

¹²Negur nē od mata ibod ken, kabī totol yalef, are dimig waila si sitakā wal fiya. Are malakanon uur ado, tuwa katō fiya, tuwa nē seselina ado atun borū fel si sitakādig. Are wau bun kisi ado oroya es fedig. ¹³Ereb erēb ganān inodin are Negur mala bun taka to iminek. Ere erēb ganān ī mala bun lele feleya ado yaor. Ī bun ada erēb age tafen anī faded tafiyēf.

Jesus Pris Mudur Odug

¹⁴Anī nigin, pris mudur odug saa ilun Negur gein iselen, are Jesus Negur Naal, ada ī ado nigin, ada momoiya kurō tafesif anī tarou kafī tafalauf. ¹⁵Are, neda pris mudur ī, neda felu yabiya kelei bagai nigin, wau yūya yaleya kisi feleya, ī ada gen mogo naab ganān bun kisi fiya yalen, anī ere, ī mosor sā. ¹⁶Anī nigin, ada megeir tano fen, Negur nē sia wagen talauf, an wau ifenēya ibodok, anī bunem, ada neda lau fiya sain bun, ada isennadauf nigin wau yūya tale fen, wau ifenēya fotou tafouf.

5 ¹Pris mudur idi ganān tamo atun yale fen, tamo kayau nigin Negur aruna dale, mosor nigin ofa ado sesewi fiya difenēf nigin igirnēdin. ²Īg yogo felu yabidig nigin, idi to kelei ken, kū difenek anidi, molol nem isennēdiya kisi feleya. ³Age fiya nigin, ī tamo kayau neid mosor nigin ado, yogon mosor nigineg sesewi fedig.

⁴Taka nem, pris mudur, yana odug anī, ī yogo bouwa bun to inodig, anī ere, ī Aron gen, Negurem dogol igirnēdig. ⁵Age fiya gen, Kristus īg

ⁿ 4:3 Sam 95:11 ^o 4:4 Jenesis 2:2 ^p 4:7 Sam 95:7, 8 ^q 4:9 Sabat naa anī, Juda neid uub nē naa.

pris mudur ibodōf nē fula fiya medeīya yogo bouwa bun to inon. Anī ere, Negur ī irokenen,

“Ō neu Kesu,

gama aya ō Tamā wō aul.”^r

6^ī taka bun eig ye irok,

“Ō faimud ubodkalauf nē pris,

Melkisedek nē gī bun.”^s

⁷Jesus ī tenebur mata ibodon sain bun, ī inā odug marum fe fen, Negur ī laa bun tamal isennēya nigin kisi feleya, ī bun kosē ye fen, igonen. Jesus ī imatkeis fen, Negur farumen ibodon nigin, Negur ī karī fiyen. ⁸Jesus ī Negur Naal, anī ere, ī darau yalen anī bunem, dō fiya nigin keleī yale fen, ⁹kisi feleya bagai wō yen. Agef fen, ī ait dō difef ganan neid mata ibodkeleya kel gei fiya nē gariya wō ye di, ¹⁰Negur ī Jesus Melkisedek nē gī bun pris mudur inenen.

Momoiya Folō Feleya Nigin Weder Irouya

¹¹Amā enei nigin wogōya musei ado, anī ere, amā faded yeīya nigin totol, ere nigin, ā keleīya nigin forō gef. ¹²Ā tise wōya nigin sain meluk adon, anī ere, ā fau taka nem Negur nē od tamo mata urug ifelnēdidig age fiya baban ifelneif nigin ubodōgef. Ā fau su yōya nigin yenek, saaf totol yōya nigin kisi feleya sā. ¹³Taka ī su yoko are ī fau momou, anī nigin, ī madur bagai nē ifelnēya keleī sā. ¹⁴Anī ere, saaf totol are biyeid neid, idi tai fiya bun, kisi def dile fen, enei biya, enei saneya keleīdig.

6 ¹Anī nigin, ada, ifelnēya gariya bunem Kristus nigin kelein daū are tator ken, keleī tōya bagai bun talauf. Ada keleī eig fediya nigin baban to gariya tanouf, are laa ileyā nē suma bun tamal faleiya, Negur nigin momoiya, ²naan igūdiya, ima teten inoya, laa bun tamal kel fāya ado, faimud ibodkeleya nē es fiya. ³Negur wau irōf are, ada keleī mugier bagai talauf.

⁴Idi Negur nē fula fiya mogo dalen, idi saa ilun nē ege luwa mogo kobū de dilen, idi Awa Uur Fateul dalen, ⁵idi Negur nē od are biya bagai ado, sain fau isiyouf anī nē megeir mogo kelein, ⁶age difen anidi momoiya folō difalauf are, idi baban waud faleiya nigin guri feid isiya kisi feleya sā, ere nigin, idi dogo baban Negur Naal aa tetek bun du ken, mal atun mama difenek.

⁷Teneub anī bun sain musei uyē isi lūf fen, kabī moroid saaf ifenēdidig, teneub are Negur el fiya ifenēdig. ⁸Anī ere, teneub bun malū duri ado lili isedif, are teneub to biya, gelu fiya melsā ibodok. Idikeleya bun yā malan isaikalauf.

⁹Oboimā tar, amā eig ma wogō mauf, anī ere, amā ā bun age fiya to wō ye fen, biya fiya ā bun isiyouf nigin momoi mauf, biya fiya are kel gei

^r 5:5 Sam 2:7 ^s 5:6 Sam 110:4

fiya ado isiyouf. ¹⁰Negur ĩ madur, ĩ, āgenei kabĩ ado wauĩ laa fiya, are ā Negur nē tamo kayau usennēdigef usigef bunem Negur ufelnēgef anĩ, weder to tu kalauf. ¹¹Amã, ā mugu mugu kabĩ totol eig fiya bagai walegef uleg, idikeleya bun ulagauf anĩ oromak, ago ge di, āgenei wauĩ iseya anĩ agef kisi falauf. ¹²Amã, ā fō yeĩf anĩ to oromak, anĩ ere, ā, idi momoi de, to fese de fen, ereb Negur ĩ afeneĩf yen anĩ dalef anidi, madē wedig ago gouf anĩ oromak.

Negur Age Afouf Yen Anĩ Momoi Bagai Agef Wō Youf

¹³Negur ĩ Abraham age afouf fiyen sain bun, taka Negur yogo wal fiya, ĩ yana bunem Negur wau kuturoleya od wogōya nigin taka to ibodon, anĩ nigin, ĩ yogo wau kuturol fen, ¹⁴iron, “Aya momoi bagai el fiya afon ken, momoi bagai gerē tar musei afonōf.”^t ¹⁵Age ye di, Abraham ĩ feseya sā tari fef ile, Negur afonōf yen anĩ yalen.

¹⁶Tamo idi waud kuturol fen, dogo neid od megeir difouf are, tamo ĩ idi wal fediya yana bunem megeir difedig. Waud kuturoleya od anim, od wogō def anĩ megeir fe fen, luwa irouya ganan irukaka kesidig. ¹⁷Age fiya bagai, Negur age afouf yen anĩ dalouf anidi bun, Negur ĩ yogon kisi to bagai falei youf anĩ yaor fenēdiyof nigin, ĩ wau kuturoleya od wogō yen anim, ĩ age afouf yen anĩ, megeir fen. ¹⁸Od uru enei, are od Negur age afouf yen ado wau kuturoleya od anĩ, faleiya kisi feleya sā, Negur ĩ od uru enei nigin idegēya kisi feleya sā anĩ bunem, wau iseya malada bun ifaref anĩ tarou kafĩ tafalauf nigin, Negur nē ahahaya bun taya telen ada anĩ, wauda fatuk yalesauf nigin Negur age fen. ¹⁹Wau iseya enei are, ada maladakanon nē anka, are totol fen, to gebe yedig. Are anim, gabar tempel namen ibodok anĩ borū fel, modoū fateul bagai bun iledig. ²⁰Jesus ĩ Melkisedek nē gĩ bun faimud ibodkeleya pris mudur wō ye fen, ĩ mogo ada nigin an uyulil ilen.

Pris Melkisedek

7 ¹Melkisedek enei Salem nē king, ĩ Negur Ilun Bagai nē pris. ĩ Abraham king geid kusĩ del wal feid fen, kel isi mog, fotou fe fen, el fiya ifenen. ²Age fe di, Abraham ereb ereb ganan ĩ ado anĩ bun tamal ten tekelei ifenen. Yana Melkisedek nē gariya are “madur bagai nē king,” takag, “Salem nē king,” anĩ nē gariya, “wau inosiya nē king.” ³Melkisedek ĩ sina tama sā, in ibor nē gĩ taka sā, wō yen nē naa ado laa nē naa taka sā, ĩ Negur Naal gen faimud ibodkeleya pris.

⁴Ī naig fiya odug bagai anĩ kisi wog. Tubu Abraham ĩg safina kusĩ bun yalen anĩ ten tekelei ifenen. ⁵Lo irok, are Lewi nē ibor nē tubu tar bun pris wowā def idi, tamo kayau bun ten tekelei dalouf, tamo kayau are

^t 6:14 Jenesis 22:17

nedi tureid tar. Tureid tar idig Abraham nē ibor, anī ere, idi age difedig. ⁶Melkisedek ī Lewi nē ibor bun tamal sã, anī ere, ī Abraham bun tamal ten tekelei yale fen, Abraham Negurem age afouf fiyen anī el fiya ifenen. ⁷Kisi togu fiya sã, tamo odugem, ī farumen anī el fiya ifenēdig. ⁸Pris tamo, idi gare dedig, ten tekelei daledig, anī ere, Melkisedek nigin, Negur nē Itotoya yaor fef, ī mata ibodkeleya, ī ten tekelei yalen. ⁹Ada sã eig tauf, Lewi ī ten tekelei yaledig, īg Abraham bunem Melkisedek ten tekelei ifenen, ¹⁰ere nigin, Lewi ī fau tubu Abraham bouwa bun ibod mog, Melkisedek ī Abraham fotou fiyen.

Jesus Ī Melkisedek Gen

¹¹Israel tamo kayau lo ifenēdin anī bun irok nigin, Lewi idi pris kabī daledig. Lewi neid pris kabī anī bun lau fiya to yenem are, ere nigin pris taka isiya nigin lau fiya fau yenen, Melkisedek nē gī bun tamal taka, Aron nē gī bun tamal sã? ¹²Pris kabī falei fouf are, lo areg falei fouf. ¹³Neda Odug nigin od enei wogō yen, are ī ibor fire bun tamal, yogon ibor bun tamal taka pris kabī to yalen. ¹⁴Neda Odug ī Juda ibor bun tamal are yaor. Anī ere, Moses ī pris nigin wogō yen sain bun, Juda ibor nigin od taka to wogō yen. ¹⁵Pris taka Melkisedek gen bagai wō yef are, od enei amā wogō maun are yaor bagai wō yef. ¹⁶Ī tamo pris kabī yaleya nē lo bunem pris to wō yen, anī ere, ī, mata, daū feleya kisi feleya sã anī nē megeir bunem pris wō yen. ¹⁷Are Negur nē Itotoya eig ye irok kilei:

“Ō faimud ubodkalauf nē pris,
Melkisedek nē gī bun.”^u

¹⁸Lo tubu are megeir sã, kabī to yaledig, anī nigin, yerin gadi difelef, ¹⁹(ere nigin, lo anim erab taka to madur fedig). Anī ere, wau iseya biya anī wō yef, anī bunem, ada Negur non telef.

²⁰Negur ī Jesus pris inenen, are wau kuturoleya od sã to inenen. Pris tunī ganani idi age fiya sã, idi wau kuturoleya od sã, pris wō den. ²¹Negur ī Jesus irokenen sain bun, ī wau kuturoleya od ado pris wō yen:

“Odug wau kuturol fen iron,
are yogon kisi to falei youf,
‘Ō faimud ubodkalauf nē pris.’”^v

²²Wau kuturoleya od enei nigin, Jesus ī bar itenēya tubu wal fiya nē megeir fiya wō yen.

²³Pris idi museim dibodon, ere nigin, idi gare de fen, kabī to tokō difelen. ²⁴Anī ere, Jesus ī faimud ibodkelef, anī nigin, ī gai gai pris kabī yalef, are taka bun to ilauf. ²⁵Age fiya nigin, idi ī bunem Negur garan disif anidi, ī el fe isenneid leya kisi feleya, ere nigin, ī mata faimud ibod ken, idi nigin Negur bun kosē yef.

^u 7:17 Sam 110:4 ^v 7:21 Sam 110:4

²⁶Pris mudur age fiya anim, sã isennadauf. Ì fateul, kerema sã, amuyẽ sã, mosor adodo bun tamal gadi felen, Negur ì saa ilun bagai inenen.
²⁷Pris mudur tunĩ ganan, naa ganan, dogo neid mosor nigin ket sesewi dife fen, tamo kayau neid mosor nigin sesewi difedig, anĩ ere, Jesus ì pris anidi gen sã. Ì yogo bouwa sesewi fen sain bun, ì idi neid mosor nigin sain tekelei dogol sesewi fen. ²⁸Lo are felu yabidig tamo pris mudur igirnẽdidig, anĩ ere, Negur nẽ wau kuturoleya od, are lo dumen isin, od anim, Negur Naal, faimud kisi feleya bagai ibodkalauf nigin inenen, ì anĩ igirnen.

Bar itenëya Mata Nẽ Pris Mudur

8 ¹Amã wogõ mauf anĩ nẽ kaũ, are yeir. Ada pris mudur age fiya ado, ì saa ilun Negur nẽ sia ima biyalẽ ibod ken, ²modoũ fateul bagai, are tamom sã, Odug yogo bagai salafat inon anĩ bun aruna yalef.

³Pris mudur ganan, ofa ado yaro sesewi fiya difenẽf nigin igirnẽdif, anĩ nigin, neda Pris Mudur ig ereb taka ifenẽf nigin adouf. ⁴Ì tenebur ibodom are, ì pris to wõ yem, ere nigin, tamo lo irok kilei ofa difenẽdif are mogo dibodok. ⁵Idi modoũ fateul bagai, are saa ilun ibodok age fiya gen, anĩ nẽ malakanon bun aruna dalef. Anĩ nigin, Moses ì salafat fateul inouf nigin age fen sain bun, Negur ì weder iroun, “Lo welei, õ arei bun afelnon age fiya kilei bagai, ereb ereb ganan unouf.”^w ⁶Anĩ ere, Jesus ì kabĩ yalen are idi neid kabĩ wal fiya, ere nigin, Negur ado tamo geid bar itenëya nigin, ì atun tamo kabĩ yalef, bar itenëya anĩ, bar itenëya tubu anĩ wal fiya, bar itenëya mata anĩ, Negur od age afouf yen, are od tubu wal fiya anĩ teten inon.

⁷Bar itenëya tubu bun kũ fenëya taka to ibodom are, mata nigin to lau fiam. ⁸Anĩ ere, Negur ì tamo kayau bun kũ fenëya ile fen, iron:

“Odug irok, sain fau isif,
 are Israel tamo kayau ado
 Juda tamo kayau geid
 bar itenëya mata anouf.

⁹Bar itenëya are,
 aya idi neid tubuid tar Isip bun tamal imeid gim afe elen sain bun,
 idi tubuid tar geid,
 bar itenëya anon age fiya gen sãf.
 Idi neu bar itenëya to dõ difen nigin,
 aya idi dudum afedin.

¹⁰Odug irok, sain anĩ dumen,
 aya Israel tamo kayau geid, bar itenëya enei anouf.
 Aya neu lo idi neid kisi bun ano fen,

^w 8:5 Eksodas 25:40

idi neid waud bun atotauf.
 Aya idi neid Negur abodōf,
 idi neu tamo kayau dibodōf.
 11 Tamo takam ne tā to ifelnēf,
 tamo takam tura to eig ye irokenēf, ‘Odug nigin keleī youf,’
 ere nigin, idi ganan aya nigin keleī youf,
 naal bagai bunem isel, odug bun.
 12 Aya idi neid sane nigin wederou tu kel fen,
 idi neid mosor nigin to karī aulauf.”^x
 13 Negur ī bar itenēya enei “mata” yen, anī bunem bar itenēya tubu are
 kabī sā. Ereb taka tubu, kabī sā yen anī, kaisā bagai iminkalauf.

Tenebur Negur Nē Salafat Bun Seli Yabiya

9 ¹Bar itenēya tubu anī, seli yabiya nigin nun ado fen, seli yabiya nē
 modoū tenebur eineg adon. ²Salafat taka dinon. Aab malabag anī
 bun, yal nē tibog, tebol ado, bret sesewi difen anī an ifaredin, modoū are
 Modoū Fateul dedig. ³Gabar Modoū Fateul bun ibodok anī dumen, aab
 taka Modoū Fateul Bagai dedig ibodon, ⁴an gol alta aa gaula sumeī nigin
 tō fiyadig ado, bar itenēya nē bogis gol nem ganan kerū feleya ibodon.
 Bogis enei bun, gol darum mana ado, Aron nē manig sana wō yen ado,
 meein bedu bar itenēya itoton ado ifaredin. ⁵Bogis teten Fula Fiya
 Medeīya Negur nē engel Serubim difaren, wayeid yarirī dife, bogis mala
 dede difen, bogis mala are modoū, Negur an mosor yaleledig. Anī ere,
 amā enei nigin gama to dir mafalauf.

⁶Sain erob erob ganan age de dodok difel fen, pris idi Negur nē kabī
 dalouf nigin, aab malabag bun naa ganan diledig. ⁷Anī ere, pris mudur
 dogol, aab Modoū Fateul Bagai dedig gabar dumen ibodok anī bun, yar
 tekelei bun sain tekelei dogol iledig. Ī naud sā to bagai iledig. Ī yogo nigin
 ado, tamo kayau neid mosor to kelei ken dinon anī nigin naud Negur
 ifenēdig. ⁸Enei bunem Awa Uur Fateul, salafat fateul urug bagai dinon
 anī fau ifar mog, Modoū Fateul Bagai bun ileya nigin, bobog fau kā feleya
 sā anī ifelnēdin. ⁹Enei are gama sain enei nigin malakanon. Are ofa ado
 yaro sesewi fiya Negur difenen anim, Negur seli yabidig tamo yogon wau
 kare keleya kisi feleya sā anī ifelnēdif. ¹⁰Safina age fediya anī, are saaf,
 naan yōya ado, amuyē lilik fiya nē tobonunā fire fire dogol. Age fediya
 anī, are bouwa buru nē lo, kabī yalef ile, suma mata nē sain bun.

Kristus Nē Naud

¹¹Kristus ĩ, erob erob biya mogo wō yen anī nē pris mudur isin. Ī salafat
 fateul odug, biya bagai bun isour yale ilen, salafat fateul are tamom to dinon,

^x 8:12 Jeremaia 31:31-34

are ereb kare fen enei nē tomina sã. ¹²Ī meme ado bulmakau naal nē naud ado to ilen, anī ere, ĩ Modoũ Fateul Bagai bun, yogon naud bunem, sain tekelei dogol isour yale ile fen, ada nigin kel gei fiya faimud ibodkeleya anī yalen. ¹³Meme ado bulmakau nē naud ado, bulmakau gober naal yã difalege di, isaikelen anī nē aas nem, idi amuyē lilik fiya sã anidi tetedin wiri dife di, idi amuyē lilik fele di, bouweid fili yedig. ¹⁴Are momoi youf are, Kristus nē naud naig fe yenēf! Ī Awa Uur faimud ibodkeleya bunem, yogo bouwa amuyē sã, Negur bun sesewi fen. Yogon naud anim, ada wauda laa bun ileyã nē tobonunã bun tamal kulo fadalef, anī bunem, ada mata ibodõya Negur aruna talouf.

¹⁵Gariya enei nigin, Kristus ĩ bar itenēya mata nē atun tamo, anī bunem, tamo Negurem iweignēdin anidi, faimud ibodkeleya akor, are Negur age afouf yen anī dalouf. Ere nigin, bar itenēya tubu bun, mosor dinon anidi, nedi mosor bun tamal yalelnēdiyof nigin, ĩ laa fen.

¹⁶Fadim anī kabī yalouf nigin, fadim yun tamo ĩ mogo laa fen are yaorouf, ¹⁷ere nigin, fadim are, tamo laa fe di dogol, kabī yaledig. Fadim yun tamo fau mata ibod mog, fadim anī to bagai kabī yaledig. ¹⁸Age fiya nigin, bar itenēya tubug naud sã to kabī yalen. ¹⁹Moses lo bun itãfiya ganã tamo kayau ganã wogõ fiyeid fen, ĩ bulmakau naal ado meme nē naud, naan ado yale falei fe fen, sipsip siwi giriya ado aa hisop were nem, lo buk bun ado tamo kayau ganã bun wiri fen. ²⁰Moses iron, “Enei are bar itenēya nē naud, are Negur ã dõ gouf nigin irokenein.”^y ²¹Naab tekelei anī bunem, ĩ salafat fateul ado sesewi fiya nē safina ganã bun naud wiri fen. ²²Momoi, lo bun irok, melsã ereb ereb ganã naud bunem kulo falauf, are naud to fi falauf are, mosor nigin weder to tu kalauf.

²³Anī nigin, saa ilun nē safina anī nē malakanon, sesewi fiya enei bunem kulo feledig, anī ere, saa ilun nē safina dogo, sesewi fiya enei wal fiya bunem, age fedig. ²⁴Kristus ĩ modoũ fateul tamom dinon, are modoũ fateul momoi bagai nē malakanon anī bun to ilen. Ī saa ilun bagai anī bun ile fen, Negur mala bun ada nigin wõ yen. ²⁵Pris mudur ĩ, yogo naud sã, yaro naud ado, yar ganã Modoũ Fateul Bagai bun iledig. Anī ere, Kristus ĩ yogo bouwa baba baban sesewi fouf nigin saa ilun to ilen. ²⁶Kristus ĩ age fem are, teneub kare fiya sain bunem isin are, ĩ sain musei darau yalem. Anī ere, gama idikeleya sain enei bun, ĩ yogo bouwa sesewi fe fen, mosor yalelauf nigin, sain tekelei dogol wõ yen. ²⁷Tamo ganã sain tekelei dogol gare douf, anī dumen, Negur es fediyof. ²⁸Age fiya gen, Jesus ĩg tamo kayau musei neid mosor yalel kenēdiyof nigin, yogo bouwa sesewi fe, tekelei fen. Ī baban isiyof, are mosor yaleleya nigin sã, anī ere, tamo idi ĩ tari difef anidi kel gei fediyof nigin.

Jesus Sesewi Fe, Tekelei Felen

10 ¹Lo are safina biya isif anī nē malakanon dogol, momoi bagai safina biya anī sã. Agef yenek nigin, lo are, sesewi fiya de tekelei

^y 9:20 Eksodas 24:8

anī, yar ganan gai toku difenēdig anī bunem, idi Negur seli dabiyouf nigin disif anidi, madur tamo bagai wowāya kisi feleya sã bagai. ²Age fiya kisi feleyam are, idi sesewi fiya ganan ditorom. Ere nigin, Negur sesewi difedig tamo neid mosor, momoi bagai kulo felem are, idi baban mosor nigin waud to morō fedim. ³Anī ere, yar ganan bun sesewi fiya anim, tamo kayau idi, mosor nigin karī deledig, ⁴ere nigin, bulmakau ado meme nē naud anim mosor yaleleya kisi feleya sã.

⁵Anī nigin, Kristus tenebur isi fen, iron:

“Ō sesewi fiya ado ofa to oroyon,
anī ere, ō aya nigin bouwa taka dodok won.

⁶Ō, ofa yā bun ifaleg isaikeleya anī ado,
mosor yaleleya nē ofa anī nigin waū to iron.

⁷Ago di, aya oron, ‘Aya nigin buk bun eig ye itoton,

O Negur, aya yeir, aya ogon oroya dō afouf nigin asin.’”^z

⁸Ī uruwa iron, “Sesewi fiya ado ofa, ofa yā bun ifaleg isaikeleya anī ado, mosor yaleleya nē ofa anī ō to oroyon, anī nigin waū to iron” (anī ere, lo are, idi age difouf nigin iron). ⁹Age ye fen, ĩ iron, “Aya yeir, aya ogon oroya dō afouf nigin asin.” Ī mata anī inouf nigin uruwa nē anī yalelen. ¹⁰Oroya anī bun, Jesus Kristus ĩ yogo bouwa sesewi fe, tekelei felen, anī bunem, ada fateul wō taun.

¹¹Naa ganan bun, pris ganan mugu mugu difar fen, Negur nigin dogo neid kabī daledig. Idi sesewi fiya de tekelei anī toku difenēdig, sesewi fiya anim mosor yaleleya nigin kisi feleya sã bagai. ¹²Anī ere, Kristus ĩ mosor nigin gai gai nē sesewi fiya tekelei fele fen, Negur ima biyalē ibodon. ¹³Sain anī bunem isi gama, Kristus ĩ, yogon kiwai tar Negurem Kristus ye inoya nē sawa inenēdiyof anī tari fef. ¹⁴Ī sesewi fe, tekelei felen anim, idi mosor bun temeleid kulo feledif anidi, gai gai nigin madur feledin.

¹⁵Awa Uur Fateul ĩg od enei nigin eig ye irokanadaf. Uyulil ĩ irok:

¹⁶“Odug irok, sain anī dumen,
aya idi geid bar itenēya enei anouf.

Aya neu lo idi waud bun ano fen,
idi neid kisi bun atotauf.”^a

¹⁷Age ye fen, ĩ tobol fe irok:

“Dogo neid mosor ado sane age difedig are,
aya to karī aulauf.”^b

¹⁸Mosor enei weder tu kelen ouf are, baban mosor nigin sesewi fiya taka to yenek.

To Fese Tauf Nigin Iweigya

¹⁹Anī nigin, turamā tar, ada Jesus nē naud bunem, Modoū Fateul Bagai bun tuninir ya sã ileyā nigin kisi feleya. ²⁰An ileyā nē naab are, mata

^z 10:7 Sam 40:6-8 ^a 10:16 Jeremaia 31:33 ^b 10:17 Jeremaia 31:34

ibodōya nē naab mata, are ī, ada nigin, gabar Modoū Fateul Bagai bun ileyā nigin bobog katī felen anī serek felen bunem kā felen, gabar are yogo bouwa. ²¹Ada Negur nē fō lo fiya nigin pris odug ado. ²²Anī nigin, ada wauda tutuk fen, momoiya total ado Negur non talauf, ere nigin, ada wauda, mosor nē wau morō bun tamal wirif kulo fada le fen, bouwada naan karētut nem kulo felen. ²³Neda wauda iseya ada wogō taudig anī, ada tarou kafī tafalauf, ere nigin, Negur age afouf yen, are ī de age fouf bagai. ²⁴Ada wau laa fiya ado tobonunā biya bun talauf nigin, abob wau yaleseya nigin kisi tafouf. ²⁵Ada guru fiya anī to tatorōf, tunī to guru difedig gen, to age tafouf, anī ere, ada abob wau talesef talauf, ere nigin, ā, Odug nē Naa melsā isif are ulegef.

²⁶Ada momoi anī kelei ken, neda oroya dō tafe, mosor tanof talauf are, mosor yaleleya nē sesewi fiya taka to ibodok, ²⁷anī ere, Negur yogon es fiya ado, yā bobo reya anim yogon kiwai tar yakur feid isasaikalauf anī, kumī ado tari fiya dogol ibodok. ²⁸Taka ī Moses nē lo dudum fen, ī nigin tamo urom be towom, ī age fen anī yaor dife di, waud yūya sā dukesi di, laa fen. ²⁹Age fiyauf are, taka ī, Negur Naal ye nem lai fe fen, bar itenēya nē naud anim ī mosor bun tamal kulo fiyekelen anī, fateul sā gen inene ken, wau ifenēya nē Awa Ur kono fiyek ī, darau naig fiya bagai yalouf anī kisi gef. ³⁰Ere nigin, ada kelei, Negur eig ye iron, “Taka ī sane age fouf, ī mala solo sane ifenēya are neu kabī, ayam mala solo sane afenēf.”^c Takag, ī baban iron, “Odug ī yogon tamo kayau es fediyouf.”^d ³¹Taka ī mata ibodōya Negur ima bun ilauf are, ī fatuk bagai kumī tererē youf.

³²Ā uruwa bun fula fiya walegen, anī dumen naig wog ufaregen anī kisi waleg. Sain anī bun ā darau nē kusī odug walegen, anī ere, total ufaregen. ³³Sain tunī, ā mal atun kono diyei ken, darau difeneidig. Sain tunī, ā, idi morō age fiya dalen anidi usennēdigedig. ³⁴Ā tamo kalabus bun dibodon anidi nigin wauī yūya wenēdigen, agog fen, tamo idi āgenei safina ganā dale di, ā kuliya ado folō wol kenēdigen, ere nigin, ā kelei, ā aug safina biya, mata gai gai ibodkeleya nē ado.

³⁵Anī nigin, āgenei kisi total anī to folō walagauf, are fau mala solo odug bagai ifeneif. ³⁶Ā total ufaragauf, anī bunem, ā Negur nē oroya dōg fen, ereb ī age afouf yen anī walogouf. ³⁷Ere nigin, sain naal bagai ilele di, “Tamo ī isif, are fau isiyouf, ī to foi youf.

³⁸ Anī ere, neu tamo madur bagai, ī momoiya bunem mata ibodōf. Ī dumelem soso rouf are, aya ī nigin wau to al fouf.”^e

³⁹Anī ere, ada, idi dumelem soso de fen, fō delef gen sā, anī ere, ada, idi momoi de fen, isennēya dalef gen.

^c 10:30a Diuteronomi 32:35 ^d 10:30b Diuteronomi 32:36; Sam 135:14 ^e 10:38 Habakuk 2:3, 4

Momoiya Bunem

11 ¹Momoiya are, ereb nigin wauda isef anī, de momoi bagai agef wō youf tauf anī. Momoiya are, ereb ada maladam to tailef anī, de momoi bagai ibodok tauf anī. ²Kulu nē tamo kayau, dogo neid momoiya bunem, Negur idi nigin de fiyēdin.

³Momoiya bunem, ada keleī, Negur irō di, saa teneub ado wō yen, anī nigin, ereb ada malada bun tailef are, maladam to tailef anim inodin. ⁴Momoiya bunem, Abel ī sesewi fiya, Kain nē wal fiya Negur ifenen. Abel nē momoiya bunem, Negur ī Abel nigin madur tamo bagai yen, ere nigin, Negur ī Abel nē sesewi fiya are de yen. Abel ī laa fen, anī ere, momoiya bunem, ī fau wogō yef.

⁵Momoiya bunem, Enok teneub enei bun tamal yalelnen, anī nigin, ī to laa fen. Negurem ī yalelnen nigin, takam ī to fotou fiyen. Negur nē Itotoya irok, Negur ī fau to yale mog, ī Negur wau al fiya ifenen. ⁶Taka ī to momoi youf are, ī Negur wau al fiya ifenēya kisi feleya sā, ere nigin, taka ī Negur gein isif, are Negur ibodok anī ado, ī dimirnek anidi mala solo ifenēdidig anī, de momoi bagai youf.

⁷Momoiya bunem, Noa ī ereb malam fau ileyā sā mog, Negurem weder iroun anī karī ye fen, ī Negur anini fiye ken, yogon ibor isennēdiyof nigin waag taka kare fen. Yogon momoiya bunem, Noa ī, teneub enei mosor ado anī yaor fe fen, madur bagai, are momoiya bunem isif anī, Negur bun tamal yalen.

⁸Negur ī, Abraham yogon akor fau yalouf modoū bun ilauf nigin iweignen sain bun, Abraham ī nain be ilauf ya anī keleī san. Anī ere, ī momoiya bunem Negur nē od dōf fen, ilen. ⁹Momoiya bunem, Abraham ī, Negur afonōf yen teneub anī bun, yaū teneub bun yaū tamo gen ibodon. Ī salafat bun ibodon, Isak Jakop ado, idi Negur afonōf yen od tekelei Abraham yalen anī dalen, idig salafat bun dibodon. ¹⁰Are Abraham ī, taun anī gariya teten total ifaref, are Negurem eig fe yenēf ye fen, kare fen anī tari fedig.

¹¹Abraham ī tubau bagai, Sara ī yogo dali. Anī ere, momoiya bunem, Abraham tama wōya nigin kisi felen, ere nigin, ī, Negur age afouf yen anī agef wō youf bagai ye fen, momoi yen. ¹²Anī nigin, tamo tekelei ī tubau bagai laa tamo gen, ī bunem yogon ibor nē tubu tar, saa ilun barisa ado maaī ubun kulum yenek gen, iwesleya kisi feleya sā, fulus fen.

¹³Tamo kayau eneidi ganam momoi de fen, gare den. Idi ereb Negur ī age afouf yen anī to dalen. Are idi egerom meledim dogol dile fen, waud al fen. Age dife fen, teneub enei bun idi yaū tamo, namala den. ¹⁴Tamo kayau age de dirok, are dogo neid teneub dimirek anī difelnadaf. ¹⁵Idi teneub ditor disin anī nigin kisi dalem are, idi keku de dilauf nigin kisi feleya yenem. ¹⁶Age fiya ban, idi teneub biya bagai, saa ilun nē anī nigin

waud yenen. Anī nigin, Negur ī, idi nemā Negur def anī nigin to mama fef, ere nigin, ī idi neid taun taka dodok felen.

¹⁷Momoiya bunem, Negur Abraham kisi fiyen sain bun, Abraham ī, Isak anī Negur sesewi fiya ifenen. Abraham Negurem age afouf fiyen ī, naal tekelei bagai anī sesewi fiya ifenēf nigin age fen. ¹⁸Negur Abraham irokenen, “Isak bunem, ogon ibor tar wowā douf.”^f ¹⁹Abraham kisi fen, Negur ī laa tamo kel turī fiya kisi feleya. Anī nigin, ada eig tau wogōya kisi feleya, Abraham ī Isak laa bun tamal kel yalen.

²⁰Momoiya bunem, Isak ī, Jakop Esau ado, dumen bun idi neid ibodōya nigin el fiya ifenēdin.

²¹Momoiya bunem, Jakop yogon laa melsā mog, Josef gere tar monog mugu mugu el fiya ifeneid fen, yogon manig tubi bun mudur isen ken, Negur seli yabin.

²²Momoiya bunem, Josef yogon laa melsā mog, Israel tamo kayau Isip tamal ditor dilauf nigin wogō ye fen, yogon tuwa nigin faded fiyēdin.

²³Momoiya bunem, Moses sina tama adom, Moses wō ye di, ī ogō towo dinokelnen, ere nigin, Moses ī kesu meli bagai dile fen, idi king nē od nigin to kumī den.

²⁴Momoiya bunem, Moses ī biya fen, Isip king nē barai nē kesu yeya anī itoron. ²⁵Moses ī, mosor nē oroya sain naal bun dō fiya itor ken, Negur nē tamo kayau geid morō dalouf nigin wau iron. ²⁶Moses ī kisi fen, are Kristus nigin kono fiya yaleya anī, Isip nē safina biya bagai anī wal fiya, ere nigin, ī yogon mala solo dumen nē anī lo felen. ²⁷Momoiya bunem, Moses ī Isip king nē seye nigin kumī sā, Isip itor ilen. Ī total ifaren, ere nigin, Moses ī, Negur ileya kisi feleya sā anī, ilen gen age fen. ²⁸Momoiya bunem, ī Pasa ado, bobog bun naud wiri fiya nē suma inon, are Yukesiya nē Engel ī, Israel neid keso monog matu to idenkesiyouf nigin age fen.

²⁹Momoiya bunem, Israel tamo kayau, teneub maug bun gen Maaī Giriya atu diyok dilen. Anī ere, Isip tamo idi dibal mog, naan kerub fedī di, gare den.

³⁰Momoiya bunem, Israel tamo kayau, Jeriko kau, naa sewen kalī dife di, Jeriko kau narī felen.

³¹Momoiya bunem, naabur kayau Rahab, idi Negur ait to dō difedig geid to didenkesin, ere nigin, ī kofo tamo aan fiyēdin.

³²Aya baban ere od taka arokeneif? Aya Gidion, Barak, Samson, Jepta, Dawid, Samuel ado, profet idi nigin dir feleya nigin sain sā. ³³Idi momoiya bunem king geid kusī de fen, lai difedin. Idi madur bagai bunem kulatun difen. Idi Negur age afeneif yen anī dalen. Idi laion eweid difofakelen. ³⁴Idi yā bale difofor len. Idi dimig waila wal difen. Idi total

^f 11:18 Jenesis 21:12

sā, anī ere, megeir dale fen, totol difaren. Idi kusī namen totol dale fen, yaū kusī tamo lai difedin. ³⁵Kayau dogo neid tar gare dedin, baban mata ke de fafā de di, daledin. Tunī darau sane bagai dale fen, kafī fiya bun tamal yalelnēdiya ditoron, are idi kel fāya biya anī, dalouf nigin age difen. ³⁶Tunī kono fiya ado tibog dalen, tunī sen nem difofa ken, kalabus bun dinenēdin. ³⁷Idi meein tulu difedin. Idi so nem kokour difedi di, uru wō yen. Idi dimig nem didenkesin. Idi sipsip gabar ado meme gabar difounkel dilen, are idi maleg dibodon, darau dalen, to biya difiyēdin. ³⁸Tenebur ein, idi ed fe ibodōya nigin to biya. Idi gerere tuan, arein, meein ku bun ado, teneub kur diyōdig.

³⁹Eneidi ganan, Negur, dogo neid momoiya nigin de fiyēdin. Anī ere, idi takam, Negur age afouf yen anī to yalen, ⁴⁰ere nigin, Negur ada nigin kisi biya bagai inon, are idi ada weim ouf dogol, kisi feleya bagai wowā douf nigin, Negur ī age fen.

Negur Yogon Kesu Tar Madur Fiyēdidig

12 ¹Ada momoiya tamo kayau age fediya musei budū gen kalilī difadaf. Anī nigin, ereb ereb ganan naaburada gudū fef anī ado, mosor karika sane fili fadaf anī taraile fen, abob wawal fiya nē gudu reya Negurem inokanadan anī bun, feseya sā gududu tauf. ²Ada malada Jesus bun dogol tanouf, ī neda momoiya nē gariya ado, momoiya kisi feleya bagai wōya nē. Ī wau al fiya mala bun ifaren anī nigin ye fen, ī aa tetek nigin to fese ye fen, mama yaleya nigin to kukī yen, agef fen, ī Negur nē sia ima biyalē ibodon. ³Jesus ī mosor adodo tamom kiwai fatuk difenen anī ganan faali fen, ī nigin kisi tafouf, are ā to fō yei ken, wauī folo rouf nigin age tafouf.

⁴Ā mosor ado gunī gedig, anī ere, ā fau kusīg fen, naudeī fi feleya sā. ⁵Agog fen, ā wauī yaleseya od, Negur neu kesu tar yein anī wedereī tu kelen:

“Neu kesu, ō Odug nē madur fiya to ege wouf,
Odug ī ou yōf are, waū to folo rouf,

⁶ere nigin, Odug ī, idi nigin wau laa fedig anidi madur fiyēdidig,
agef fen, ī yogon kesu tar yaledif anidi ganan darau ifenēdidig.”^g

⁷Morō ā ado are, Negur nē madur fiya anī de faali gouf. Negur ī, ā yogon kesu tar nigin age fef. Kesu nanī taka, tamam to madur fiyēdig?

⁸Negur yogon kesu tar ganan madur fiyēdidig, anī ere, ī ā to madur yeif are, ā yogon kesu tar sā, ā dubur temelesi. ⁹Ada ganan tamada tar ado, idi ada madur difada di, anī nigin bobou tafiyēdidig. Anī nigin, ada fatuk bagai neda uur nē Tama farumen tabod ken, mata tabodōf! ¹⁰Ada tamada tar, sain naal bagai, idi biya kisi difen anī kilei, madur difadan. Anī ere,

^g 12:6 Proverb 3:11, 12

Negur neda biya fiya nigin, madur fadadig, are ada ī geid fateulouf nigin age fedig. ¹¹Sain madur fiya ganan bun, wau al fiya to taledig, darau anī taledig. Anī ere, dum, idi darau age fiya bunem madur fiyēdin anidi bun, madur bagai ado wau inosiya nē faat biya wō youf.

¹²Anī nigin, imeī bubur kelediya ado iboreī felu reya megeir weledigouf. ¹³“Yeī nigin naab tutuk gouf,”^h anī bunem, yeī kirorōya to sesen lauf, are biya lediyouf.

Negur Dudum Fiya Nigin Weder Irouya

¹⁴Tamo ganan geid wauī inosiya bun ubodōg fen, fateulouf nigin kabī totol waleg. Fateul sāf are, takam Odug to ilouf. ¹⁵Taka nem Negur nē wau ifenēya to folo rouf nigin ado, aa faat dirikeī gen to wō ye fen, musei morō ifeneīd fen, amuyē ifenēdiyouf nigin lo welegei. ¹⁶Taka nem noli tobonunā to inouf nigin be, Esau gen Negur nigin kisi sā to ibodōf nigin lo welegei. Esau ī, kesu matu nigin yogon akor fau yalouf anī, sain tekelei nē saaf anī nem na sur fen. ¹⁷Anī dumen, ā karī gef kilei, ī el fiya enei akorouf nigin oron, anī ere, ī to yalen. Ī inā ado el fiya anī imiren, anī ere, ī wau faleiya nigin naab taka san.

¹⁸Ā arei eig fiya bun to usigen, arei are kobū fiya kisi feleya, yā balē yef ado, gugum, tubutubuya, uyē yau total ado, ¹⁹taur ait, ait taka od wogōya nē, are tamo idi ait anī karī de fen, od baban to wogō fiyēdiyouf nigin digonen, ²⁰ere nigin, idi eig ye irokenēdin anī yaleya kisi feleya sā, “Gaar taka arei anī kobū foug, meein tulu difouf.”ⁱ ²¹Moses anī ile fen, fatuk bagai kumī ise fen, iron, “Aya kumī tererē auf.”^j

²²Anī ere, ā Saion Arei bun, saa ilun nē Jerusalem, are mata ibodōya Negur nē taun usigen. Ā engel mala musei biya al de guru difef bun usigen. ²³Ā, Negur nē kesu matu, idi yeneid saa ilun itoton anidi neid sios bun usigen. Ā tamo ganan nē es fiya Negur bun ado, madur tamo kisi feleya bagai wowā den anidi neid uur bun usigen. ²⁴Ā, Jesus, bar itenēya mata nē atun tamo bun ado, naud wiri fen, are Abel nē naud wogō yef anī wal fiya od wogō yef anī bun usigen.

²⁵Lo welegei, are ī wogō yef anī to dudum wog. Idi tenebur ein wedereid iroun ī dudum difiyen idi to diyalelen, ani nigin, ada saa ilunem wederada irouf ī dudum tafouf are, ada iyaleleya nigin malai bagai. ²⁶Sain anī bun, yogon aitem teneub enei yokū fen, anī ere, gama ī promis od eig ye iron, “Baban aya teneub dogol sā, saa ado yokū afouf.”^k ²⁷Od “baban” yef are ifelnadaf, are ereb ereb inodin yokū fiya kisi feleya anī yokū feid fen, yalelauf, are ereb yokū fiya kisi felya sā anī fau ifarauf nigin age fouf.

^h 12:13 Proverb 4:26 ⁱ 12:20 Eksodas 19:12, 13 ^j 12:21 Diuteronomi 9:19

^k 12:26 Hagai 2:6

²⁸Ada tano yokū fiya kisi feleya sã anī talef, anī nigin, Negur de tafiye ken, Negur wau al foug nigin, kumī ado aniniya bunem, Negur seli tabiyouf, ²⁹ere nigin, neda “Negur ī isaikeleya nē yã.”^l

Idikeleya Nē Wau Yaleseya Od

13 ¹Abob nigin tureī tar gen, toku wauī laa foug. ²Tamo mata urug yalediya nigin to wedereī tu kalauf, tamo tunī age difen are, keleī sa ken, engel gei difedin. ³Idi kalabus bun difaref anidi, ā idi geid takai kalabus bun ifareya gen, karī wedigouf. Idi to biya difiyēdif anidi, ā morō takai walegef gen, karī wedigouf.

⁴Tamo kayau ado bagu fiya nigin, tamo ganan, yana odug an dinouf. Tamo kayau ado bagu fiya nē fatar karētut ibodōf, ere nigin, Negur ī, idi seseirā tobonunā dinof anidi ado, idi noli tobonunā dinof anidi, es fediyouf. ⁵Moni nigin kisi fatuk to unogouf, safina ā adof anī, are eī de gouf, ere nigin, Negur ī iron,

“Aya to bagai atorneīf,
aya to bagai folō ayeikalauf.”^m

⁶Anī nigin, ada kumī sã torōf,

“Oduḡ ī neu isennēya, aya to kumī auf.
Aya tamom ere naig fiyauf?”ⁿ

⁷Āgenei uyu irouya, Negur nē od wogō diyein anī karī walagauf. Idi naig de dibodok disi di, ereb wō yen anī kisig fen, idi neid momoiya madē gouf. ⁸Jesus Kristus ī to falei yedig, nor, gama ado, sain ganan, de agef ibodkeledig.

⁹Ā ifelnēya fire fire anim to wewu yeī irouleyeīf. Ada wauda, wau ifenēya anim megeir foug anī biya, saaf nē lo dō fiya bunem ada wauda to megeir foug, are idi saaf nē lo dō de doko anidi, anim to isennēdif. ¹⁰Ada alta ado, an pris salafat fateul bun kabī daledig idi, neda alta anī bun yōya nigin kisi feleya sã.

¹¹Pris mudur, yaro naud anī, mosor nē sesewi fiya Negur ifenēf nigin, Modoū Fateul Bagai bun iledig, yaro bouwa are, fō mayā dumeitur difaleg isaikeledig. ¹²Anī nigin, Jesus īḡ yogon naud bunem, tamo kayau neid mosor yalelauf nigin, taun bobog dumeitur darau faali fen. ¹³Anī nigin, ada, ī mama faali fen anī tale fen, fō mayā dumeitur ī gein talauf. ¹⁴Ere nigin, ada, tenebur ein, faimud ibodkeleya nē taun sã, anī ere, ada taun fau isiyouf anī tamirek.

¹⁵Anī nigin, ada toku, Jesus bunem, yana yaleseya nē sesewi fiya, Negur tafenēf, yana yaleseya nē sesewi fiya are, sigoradam Jesus yana kurō tafesif anī. ¹⁶Ereb ereb biya agog fen, abob wenēgouf anī to wedereī tu kalauf, ere nigin, sesewi fiya age fediya anim Negur wau al

^l 12:29 Diuteronomi 4:24 ^m 13:5 Diuteronomi 31:6 ⁿ 13:6 Sam 118:6, 7

fedig. ¹⁷Āgenei uyu irouya farumen ubodōg fen, karī wiyēdigouf. Idi ā lo diyēdig, idi dogo neid kabī nigin dum Negur dirokenēf. Idi karī wiyēdigouf, anī bunem, idi neid kabī morō sā, wau kulīya ado dalouf, ere nigin, idi morō ado kabī dalouf are, ā to isenneif.

¹⁸Amā nigin kosē gouf. Amā momoi mauf, are amā kisi karētut ado, amā ereb ereb ganan bun biya age mafouf nigin oromak. ¹⁹Negur aya ā gein kaisā bagai sur fiyauf nigin, ā kosē gouf nigin, fatuk bagai arokeneik.

²⁰Wau inosiya nē Negur ī, faimud ibodkeleya bar itenēya nē naud bunem, neda Odug Jesus, sipsip lo fiya tamo odug, laa bun tamal kel irousin. ²¹Wau inosiya nē Negur ī, Jesus Kristus bunem, yogon oroya dō gouf nigin ereb ereb biya ganan ā ifenei ken, yogo wau al foug nigin ada bun kabī yalouf anī amā oromak. Negur ī bun fula fiya medeīya gai gai ibodōf. Momoi.

²²Turau tar, ā, neu wau yaleseya od anī, karī gouf nigin, total bagai arokeneik, ere nigin, aya pas tobega dogol atokenein.

²³Neda turada Timoti, kalabus bun tamal ulō yesin anī, ā keleī youf nigin aya orouf. Ī kaisā wō youf are, amā urom ā mailiyeif nigin masiyouf.

²⁴Āgenei uyu irouya ganan ado, Negur nē tamo kayau ganan aan wiyēdigouf. Idi Itali temeleid, ā bun, idi neid aanya, sur difeneik.

²⁵Negur nē wau ifenēya ā ganan bun ibodōf.